

Pirimon na letama

Pol na waikaiwama

Kapore Pirimon,

¹ Taugu Pol, Yesu Keriso isane è diburana, be Timoti turadama. Tauma uma letanama ka girugirumina tam Pirimon turamaima be taunoya sagumaima ġarome, ² be mate nuvudama Apia, be tauwai ġavia sagudama Arikipas, be ekalesia aitaūġa am vadae tawai rawateġeidina matabumi ġaromie. ³ Mamaitua Tamadama be Bada Yesu Keriso adi raunuatoima be adi subama ġaromie ta kenana.

Waikaiwa be moiragi

⁴ Taugu yà noġonoġotimna raġanine, raġan matabuna moiragie yau Mamaituama yàwai kaiwena, ⁵ baninama taugu è vaie da tam am waisumaġama Yesu Keriso ġarone, be am wainuapaġoma Mamaitua na banagama matabudi ġarodie aubainama. ⁶ Taugu yà moimoiragina da tam am waisumaġe sibo kuyai rewapanana, be inam waisumeġinama sibo kuyai daberarina banaga ġesaudima ġarodie, inam kauine yawasana matabudi veredima Yesu Kerisoe tè ragaragaudina tokare kwa katai kauedina. ⁷ Tam am wainuapaġoma aubainama nuavere dosinama be duġu kuya uteguna, baninama tam turaguma, tam Mamaitua na damma nuedima kuya taigidevina.

Pol Pirimon yai bağana da sibo Onesmas ya veraugā munağena

⁸ Vutuna aubainama Keriso isane ma raudebatoragu è riuem da aba sibo kuya voienna, be nam yà riuem, ⁹ baninama nuaguma kwa pağopağona aubainama. Taugu Pol yodi èi dosina, be mate Yesu Kerisoe è diburana.

¹⁰ Taugu yàwai bağamna natuguma Onesmas aubainama, taugu dibure è miamiana rağanine arue tauna èi natunena. ¹¹ Boni tauna nam i sagum be noya veredima i voivoiedina, ibewa. Be yodi tauna banaga verenama ya tubuğana tam be taugu anisagudama aubainama. ¹² Taugu Onesmas yà riuriupore munağena ġarome. Tauna vutuna nuanuaguma be è riupore da e veraverauna.

¹³ Taugu uma dibure yà miamiana vari verenama kana taiye. Be taugu è ġoegoena da Onesmas sibo uma dibure è rabe kwase da sibo ya saguguna tam epaiyamma. ¹⁴ Be taugu nam e ġoegoena da tauna sibo è rabe kwase yababe, be değoda tam kui aninana, inam naumeki. Be mate taugu nam ama ġoegoena da tam sibo è segerim be Onesmas kuyai anine, saguguma aubainama. Ibewa da tamğa am ġoane nama. ¹⁵ Anikitanama Onesmas rağan ġaubonağ'a ya rautapa gosemna, be yodi tokare agunai da mate ko mia nonoğana. ¹⁶ Be tauna yodi nam taunoya yababa boni maika, ibewa be tauna yodi Yesu Kerisoe turaguma, be tam tura vavasağimma.

¹⁷ Vutuna aubainama taugu değoda tam turamma, naumeki da Onesmas kwai aninena maika kabe taugu. ¹⁸ Be tauna değoda ġarome aba ima voivoia waigewa bo ima danedanene,

naumeki da vitanama taugu yà paǵona. ¹⁹ Taugu Pol nimague è girumana kwa sievi: Taugu tokare yài maesimna. Be taugu yawasana kedanama èi kataim be èi yawasanimna, vutuna inam yau sipoma ǵarome. Be inam dabudine tokare nam aba yà riuem.

²⁰ Tam turaguma, vutuna aubainama aba Bada isane èi baǵamna, naumeki da sibo kuya voie, be taugu nuaguma sibo kuyai subana. ²¹ Taugu uma letanama è girumina ǵarome. Be è kataiena da aba èwai baǵamna na ruvama e kenana, be tam tokare ya moraba vavasaǵana kwa voienna.

²² Yodi yaba ǵesau yà riuem: Bada ami moiragma e pariparibeena da taugu tokare yà verauna ǵaromie. Vutuna aubainama tam am vadae yau gabuma kwa vokaukaua wainonoǵi be e kenakena.

²³ Epapras ewai kaiwemna. Tauna taugu mate Yesu Keriso isane kè diburana. ²⁴ Be yau banagama tausaguguma Mak, Aristakas, Demas be Luk mate tawai kaiwemna.

²⁵ Bada Yesu Keriso aruimima e rabedina. Be na raukiviverema taumi ǵaromie e kenana.

**Vari Verenama
The New Testament in the Dawawa Language of
Papua New Guinea
Nupela Testamen long tokples Dawawa long Niugini**
copyright © 2002 Wycliffe Bible Translators, Inc.

Language: Dawawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files dated 9 Oct 2020

9b8bda32-db42-5be3-9d24-4e4a5d5f65b2